

KO JE UKRIVU A KO UPRAVU?

Neka je hvala Allahu, dž.š., Gospodaru svih svjetova. Neka su salavat i selam na Poslanika Muhammeda, s.a.v.s., njegovu časnu porodicu, ashabe i sve sljedbenike, koji teže jedinstvu Ummeta.

Uzvišeni Allah u Kur'anu Časnom poručuje: **"Svi se čvrsto Allahovog užeta držite i nemojte se dijeliti!"** (Ali Imran, 103.)

Braćo moja u Dini Islamu! Čitajući navedeni ajet i posmatrajući situaciju, kako na terenu tako i u medijima, ne mogu se oteti dojmu da su mnogi muslimani zaboravili na ovaj ajet ili da su ga pogrešno pročitali, pa s hodno tome i pogrešno protumačili. Ne mogu da sažvaćem komentare kojima neki ljudi blate našu ulemu, na čelu sa uvaženim Reisul-ulemom dr. Husein ef. Kavazovićem, zatim naše mudrace, kao što je rahmetli Alija Izetbegović, te naše kulturne umjetnike kao što je rahmetli Halid Bešlić. To je dno dna na koje su se neki ljudi spustili, a koji su zaboravili da je Poslanik, s.a.v.s., rekao da je čast čovjeka veća od časti Ka'be.

Nekim pametnjakovićima ništa nije sveto, pa gaze druge kako bi sebe uzdigli, a zaboravljaju da je Poslanik, s.a.v.s., rekao da u Džennet neće ući onaj u čijem srcu bude koliko i trun oholosti. Kada su ga upitali šta je to oholost, on je odgovorio da je to uzdizanje sebe kako bi se ponizilo druge. Petljaju se neki likovi u Božije stvari pa sebi dopuštaju da odrede ko je to na Pravome putu a ko nije, ko će u Džennet a ko u Džehennem i ko će na koji način biti proživljen. Zaboravljaju na hadisi kudsi u kome Gospodar svjetova žestoko prijeti takvim ljudima upitavši ko je taj ko u Njegovo ime određuje ko će u Džennet a ko u Džehennem, nakon čega će takve ljude baciti u Džehennem.

Neki likovi su sebi umislili da su jedino oni na Pravome putu a da su svi ostali na pogrešnom, pa bi oni kao da "isprave krivu Drinu", pametujući o tome šta je ispravno a šta pogrešno, uzimajući sebi za pravo da tumače vjeru onako kako se njima čefne ili kako se čefne njihovim "šejhovima", proglašavajući svoje šejhove ulemom a oduzimajući titule službenoj ulemi. I da stvar bude gora, oni privlače šire ljudske mase i pumpaju im mozgove svojim idejama i učenjima. Iako je vrlo jasan Poslanikov, s.a.v.s., hadis o predznaku smaka svijeta, koji se ogleda u tome da će Uzvišeni Allah usmrtiti ulemu, pa kad više ne bude uleme ljudi će slijediti neznalice, koje će i same biti u zabludi pa tako i druge odvoditi u zabludu, ipak se mora reći da je trenutna situacija u svijetu vrlo slična toj u spomenutom hadisu (iako još uvijek ima uleme, hvala Dragom Allahu).

I nisu samo pojedinci ti koji blate druge, već i čitave grupe. Nemoguće je ne primjetiti rat riječima koji se vodi između sufija i selefija. A čemu to? I dokle više? Kad bi se rat vodio još 1000 godina, sufije neće promijeniti svoje stavove i svoju viziju Pravoga puta, a isto tako ni selefije. A šta je njihov cilj? Zadobiti što više istomišljenika a na temu da su jedni upravu a drugi ukrivu, a ustvari, i jedni i drugi su i upravu i ukrivu.

Upravu su jer su i jedni i drugi na Pravome putu, u potpunosti slijede šerijat i gledaju da se putem odgoja i dodatnih ibadeta duhovno uzdignu i Gospodaru svome približe. Ukrivu su jer smatraju da su oni drugi u zabludi i da uvode nekakve novotarije, što ulaze u bespotrebne rasprave i što učestvuju u podjelama među ljudima. Zaboravljaju da je Allahova milost ogromna, da su staze na putu do Gospodara svjetova mnogobrojne i da je grijeh sputavati ljude da idu stazom koja im najbolje odgovara. Kada je Poslanik, s.a.v.s., čuo jednog ashaba kako uči dovu: "Allahu moj, oprosti samo meni i Muhammedu!", rekao mu je: "***Nemoj sužavati ono što je široko.***" Čak ima i sljedbenika knjige koji su na Pravome putu, koji, kako to kaže Gospodar, čitaju Allahove ajete, sedždu čine, vjeruju u Allaha i u drugi svijet, naređuju dobro i odvrćaju od zla, i žure da učine dobra djela. Kaže Gospodar: "**Oni su od dobrih.**" Dakle, riječ je o sljedbenicima knjige – nemuslimanima! A ljudi raspravljaju o tome jesu li selefije na Pravome putu i jesu li sufije na Pravome putu.

Dokle god se budemo tako ponašali, bit ćemo (kako to Poslanik, s.a.v.s., kaže) poput morske pjene – mnogobrojni a beskorisni. Dokle god ne budemo kao zlatni lanac na grbu Indonezije, čvrsto povezani onako kako to Gospodar svjetova od nas traži, bit ćemo slabi, nikakav faktor na svjetskoj pozornici i u svjetskoj politici, i više ukrivu nego upravu.

Na kraju, pozivam muslimane koji ponižavaju druge, da to prestanu činiti! Pozivam muslimane da obavezno izaberu sebi stazu Pravoga puta kojom će ići i da ne sputavaju druge na putu približavanja svome Gospodaru! I pozivam muslimane koji su u medijima oblaćeni da ne odgovaraju na uvrede, već da ih u ime Allaha prešute i ignorišu, jer tako rade oni koji su dostojanstveni i mudri, koji znaju da je devet desetina ahlaka sadržano u ignorisanju, te da Poslanik, s.a.v.s., garantuje kuću u podnožju Dženneta onima koji ostave raspravu pa makar bili i upravu.

Molim Dragog Allaha da ujedini muslimane; da nam podari snage, znanja i mudrosti da prevaziđemo međusobne razlike, nerazumijevanja i netrpeljivosti; da nas uputi stazama koje ka Njemu vode; da nam podari Svoju uputu i zaštitu; i da nam bude milostiv na Sudnjem danu. Amin.